



Ika-Napulo'g Siyam nga Dominggo
sa Kasarangang Panahon
Agosto 10, 2014

Ma-Dominggong Tamdanang Liturhikal alang sa Simbahan sa Kabus sa Diwa sa Bag-ong Ebanghelisasyon

Gisangyaw sa Simbahan sa kabus, pinaagi sa Gagmayng Simbahanong Katilingban, diha sa usa ka diyalogo, ang kadagaya sa presensya sa Dios kon siya tawhanong mosagubang sa mga gahum sa siyudad, mopuyo sa bag-ong kagawasan diha sa kadagatan ug mosud-ong sa kamatuoran uban ni Jesus diha sa bukid!

Uban sa PKP-II, magpadayon kita sa pagpamalandong sa gasa sa Pagtoo nga gihatag sa Dios kanato diha ni Jesus. Ang PKP-II nagkanayon:

Ang Tawag ni Jesus Karon

1.c) Usa ka Mahigugmaong Pagtoo (69) Kini nga pagtoo mahamtong ug makahatag-ug-kinabuhi pinaagi sa gugma. Sama ra nga ang pagtoong walay buhat patay, nan ang pagtoong walay gugma patay usab. 'Kon ako adunay pagtoo nga makapalihok sa mga bukid, apan walay gugma, ako walay kapuslanan.' Kini lamang ang mahinungdanon, matud pa ni Pablo: 'ang pagtoong may buhat pinaagi sa gugma.'

(70) Ang gugma, human sa tanan, mao ang nagpatakus kanato sa pag-ila sa

Dios ug nagpahisama kanato Kaniya, kay ang Dios gugma. 'Ang walay gugma dili makaila sa Dios. '

(71) Aron ma-Kristohanon, dili bulagon niining gugmaha ang gugma sa Dios ug ang gugma sa silingan. Aktibo kining gugmaha, nga gipakita pinaagi sa pagkamasulundon sa mga sugo sa Dios ug ni Kristo. Kining gugmaha sama sa kang Kristo, usa ka pakig-abin sa gugma Dios nga miabut kanato pinaagi sa iyang Anak: 'Sama ra nga gihigugma ako sa Amahan, dan, gihigugma ko usab kamo. Pagpabilin sa akong gugma.' 'Paghinigugmaay kamo sa usag-usa ingon nga ako nahigugma kaninyo.' Nan, kon ang usa ka Kristiyano mahigugma, kinahanglang mahigugma gayud siya susama sa kasingkasing mismo ni Kristo, andam mobayad sa bili bisan pa sa pagtugyan sa kinabuhi alang sa mga kaigsoonan."

Kining gugmaha mao ang kinaiyang timaan sa mga Kristohanong tinunan: 'Kini mao ang paagi nga ang tanan masayod nga kamo akong mga tinun-an, kon kamo adunay gugma sa usag-usa.'"

Ang pangutana alang kanato, binagsa ug isip mga pamilya ug mga GSK mao kini: matinud-anon ba kaha natong higugmaon ang atong silingan nga wala nato mailhi apan atong gipangita kay nagkinahanglan sa atong tabang, kalooy ug pakighiusa? Mahimo ba kaha nga nahigugma kita sa atong silingang atong giilang higala sa pamaaging dili angay sa usa ka pagtoong nahigugma? Nganong wala may pulos ug walay sulod ug walay pagtuo ang maong paagi sa paghigugma? ■

RITO SA PAGESUGOD

Tan-awa ang imong kasabutan, O Ginoo, ug ayaw hikalimti ang kinabuhi sa imong mga kabus sa kahangturan. Bangon, O Dios, ug panalipdi ang imong katungod, ug ayaw hikalimti ang mga singgit sa mga tawo nga nangita kanimo.

P: Sa ngalan sa Amahan ug sa Anak ug sa Espiritu Santo.

K: Amen.

P: Ang Ginoo maanaa kaninyo.

K: Maanaa usab kanimo.

Pasiuna ug Pag-abi-abi

P: Mga minahal kong mga igsoon: Nagkatigom kita karon libut sa halaran aron pagpasalamat ug pagdayeg sa Dios tungod sa tanan nga mga panalangin nga iyang gihatag kanato sa atong kinabuhi, niining kalibutan. Karon, iampo nato ilabi na ang atong mga kaigsoonan sa lain-laing mga bahin sa kalibutan nga gilapa-lapa sa gubat, nga ang pagdumot ug kahakog maigpawan sa pag-amomahay ug sa pagkamanggihatagon, nga ang kabangis ug panimalos mapulihan sa panagsabot-sabot ug pagsinaligay.

Akto sa Paghinulsol

P: Mga igsoon, ato karong angkonon ang atong mga sala ug pangayoon ta sa Diyos ang iyang kalooy ug pasaylo kay siya atong Diyos sa gugma ug kaaghop.

P: Ginoong Jesus, gitawag mo kami nga mobarug sa tinuod ug sa matarung taliwala sa among tawhanong mga kahadlok ug mga pagpanagana.

Ginoo, malooy ka.

K: Ginoo, malooy ka.

P: Ginoong Jesus, gitawag mo kami sa pagpa-ambit sa among mga kasinatian kanimo diha sa diyalogo uban sa mga kasinatian sa uban.

Kristo, malooy ka.

K: Kristo, malooy ka.

P: Ginoong Jesus, gitawag mo kami nga mobahin sa mga pagbati sa imong kasingkasing, ug sa panglantaw sa Amahan.

Ginoo, malooy ka.

K: Ginoo, malooy ka.

P: Kaloy-an unta kita sa Dios nga makagagahum sa tanan ug pasayloon ang atong mga sala, dad-on unta kita niya ngadto sa kinabuhing dayon.

K: Amen.

Himaya sa Diyos didto sa langit...

Kolekta

P: Mag-ampo kita: Labawng makagagahum ug buhi sa kanunay nga Dios, kinsa among gipangahasang tawgon nga among Amahan pinaagi sa pagtudlo sa Espiritu Santo, dad-a, nag-ampo kami, sa kahingpitan sa among mga kasingkasing ang diwa sa pagsagop kanamo isip imong mga anak, nga kami mahimong takos sa pagsulod diha sa kabilin nga imong gisaad.

Pinaagi sa among Ginoong Jesukristo imong Anak, nga buhi ug hari uban kanimo ug sa Espiritu Santo, Dios nga usa, hangtud sa kahangturan.

K: Amen.

LITURHIYA SA PULONG

Unang Pagbasa: 1 Mga Hari 19:9a, 11-13a

L: Pagbasa gikan sa Unang Basahon sa mga Hari

(Basahon gikan sa Kasulatan)

L: Ang Pulong sa Ginoo.

K: Salamat sa Dios.

Komentaryo sa 1 Mga Hari 19:9a, 11-13a:

Ginoo, asa ka namo makit-i? Sa tradisyonal nga mga paagi sa Diosnong pagpadayag ngadto sa usa ka propeta, ang kusog nga hangin, mga linog, mga sunog ug dagkung kasamok nagpaila sa presensya sa Dios. Apan dinhi, niining particular nga yugto sa kasinatian ni Propeta Elias, kining mga bantogang mga sinyales nagmantala sa pagpalta sa Dios. Hinunoa, ang Dios anaa diha

sa pinong paghunghong sa tingog sa usa ka malumong hoyohoy! Tinuod, nagpahinumdom kining tudlinga sa kasinatian ni Moises sa panagtagbo sa Dios sa bukid. Si Elias, sama kang Moises, kinahanglang mobalhin gikan sa siyudad – ang dapit sa pakig-asdang batok sa mga yutan-ong gahum - ngadto sa kamingawan, ang dapit sa mga bag-ong kahigayonan ug mga pagsulay, ngadto sa bukid sa panagtagbo sa Dios. Kining panaw ngadto sa kagahapon mao usab ang panaw sa katawhan: usa ka dula sa kahadlok ug sa pagsagubang, sa pagpanglutos ug sa posibilidad sa kamatayon, sa kakapoy, kagutom ug kawalay paglaum, sa kasal-anan ug pagkasad-an, ug sa katapusan, sa pag-alima pinaagi sa bag-ong pan ug ilimnon: ang presensiya sa Dios diha sa usa ka bukid diin ang usa ka tawo makakita nga labing tin-aw.

Salmo Responsoryo: Salmo 85:9, 10, 11-12, 13-14

(Basahon gikan sa Kasulatan)

Komentaryo sa Sal 85:

Kining salmoha adunay tulo ka mga bahin. Ang atong teksto nahisakop sa ikatulong bahin. Kini mao ang usa ka nagdagang komentaryo sa orakulo: ang Dios nga nagpadayag sa kalinaw mao ang kaluwasang haduol; ang iyang Himaya nagapuyo dinhi sa atong yuta. Ang komentaryo naghulagway sa tawhanong hiyas sa Dios: ang iyang gugma ug kamatuoran nagtagbo; ang hustisya ug kalinaw naghalok; ang kamatuoran mitumaw gikan sa yuta, ang hustisya nahulog gikan sa langit. Niining kahimtanga, ang mga lumulupyo sa yuta nga nahadlok sa Dios makasinati ug kaabunda tungod sa paghari sa hustisya ug kalinaw.

Ikaduhang Pagbasa: Roma 9:1-5

L: Pagbasa gikan sa sulat ni San Pablo ngadto sa mga taga-Roma

(Basahon gikan sa Kasulatan)

L: Ang Pulong sa Ginoo.

K: *Salamat sa Dios.*

Komentaryo sa Roma 9:1-5:

Giputol ni Pablo ang iyang pakigpulong pinaagi sa pagbatbat mahitungod sa kapalaran sa Israel. Ang mga Kristiyano sa Roma nakig-ambit sa iyang kasub-anan ug kasakit. Ang mga Judio ba, ang kaliwat kon diin si Pablo gikan, may bahin ba usab sa Kinatibuk-ang Kaluwasan ni Kristo? Giandaman na sila sa tanan, apil na si Kristo nga gikan usab sa ilang kaliwatan, apan asa naman sila paingon? Pangutana kining may dalang tanghaga! Apan si Pablo namulong sa Kristohanong katilingban sa Roma: isip mga Kristiyano, ayaw pamakak. Ipadayon ang diyalogo uban sa mga dili-Kristiyano. Ambit kanila sa ilang kasakit, pakighiusa kanila sa ilang pagpangita. Tungod kay, sa katapusan, kita tanang mga igsoon. Tungod kay si Kristo andam modawat kanatong tanan, kagahapon, karon ug ugma, ang mga Kristiyano ug dili-Kristiyano managsama ug manag-uban.

Berso sa Aleluya:

L: **Aleluya, aleluya.** Maghulat ako sa Ginoo; ang akong kalag nagahulat sa iyang pulong! L: **Aleluya, aleluya.**

Ebanghelyo: Mateo 14: 22-33

P: Ang Ginoo maanaa kaninyo.

K: *Maanaa usab kanimo.*

P: Ang Santos nga Ebanghelyo sumala ni San Mateo.

K: *Himayaon ikaw, O Ginoo.*

(Basahon gikan sa Kasulatan)

P: Ang Ebanghelyo sa Ginoo.

K: *Daygon Ikaw, O Kristo.*

Komentaryo sa Mateo 14: 22-33:

Niining yugtoa, si Jesus nakit-an nga nagpalakaw sa mga tinun-an lulan sa

usa ka sakayan ngadto sa pikas nga daplin sa lanaw. Iya usab nga gipapauli ang mga panon sa katawhan. Sa siya na lang usa, mitungas siyang nag-inusara ngadto sa bukid aron mag-ampo. Sayo sa bag-ong adlaw, miadto siyang naglakaw ibabaw sa tubig padulong sa sakayan nga gisakyan sa mga tinun-an. Daw ang mga tinun-an wala mahadlok sa mga balud sa dagat; apan sila may kahadlok sa mga kalag: nagtuo sila nga siya usa ka espiritung naglakaw sa ibabaw sa tubig. Gipasaligan sila ni Jesus nga siya kadto, ug wala silay angay kahadlok.

Si Pedro, nga kanunay mahinangpong mohimo ug unang mga lakang, apan sa paaging daw kanunay sayop, miboluntaryo sa pag-adto kang Jesus sa ibabaw sa tubig. Batyagi: gihangyo niya si Jesus nga sugoon siya sa paglakaw sa tubig; dili pagsugo sa tubig nga palakwon siya sa ibabaw niini padulong kang Jesus. Gibuhat ni Jesus ang gihangyo ni Pedro; apan sa diha nga si Pedro nagsugod pagkahadlok sa kusog nga hangin, siya nag-anam ug kaunlod. Sa makausa pa, atong bantayan kining usa ka detalye: si Pedro wala makamatikod sa pagtugpo sa tubig, tungod kay siya nakahimo sa paglakaw ibabaw niini. Apan siya nakamatikod sa kusog nga hangin sa ibabaw sa tubig, ug siya nahadlok. Diha lamang siya nagsugod pagka-unlod. Busa: siya wala mahadlok tungod kay siya nalunod; hinoon, siya naunlod tungod kay siya nahadlok! Giluwas siya ni Jesus pinaagi sa pagtunol sa iyang kamot, pagdakop kang Pedro nga hapit nang malunod. Gipunting ni Jesus ang gamayng pagtuo ni Pedro nga naghimugso sa pagduha-duha. Ang hangin mihunong sa ilang pasulod sa sakayan; ug ang mga nagsakay miluhod sa atubangan ni Jesus, nagmantala: Sa pagkamatuod ikaw mao ang Anak sa Dios.

Wali: Gisangyaw sa Simbahan sa kabus, pinaagi sa Gagmayng Simbahanong Katilingban, diha sa usa ka diyologo, ang kadagaya sa presensya sa Dios kon siya tawhanong mosagubang sa mga gahum sa siyudad, mopuyo sa bag-ong kagawasan diha sa kadagatan ug mosud-ong sa kamatuoran uban ni Jesus diha sa bukid!

Sumadang Mensahe sa mga Pagbasa sa Dominggo	Ang Simbahan sa Kabus: Konkreto ng Hulagway sa kabus ug sa ilang kahimtang	Mga Puntos para sa Pamalandong/ Panawagan/ Hagit
Gisangyaw sa Simbahan sa kabus, pinaagi sa Gagmayng Simbahanong Katilingban, diha sa usa ka diyologo, ang kadagaya sa presensya sa Dios kon siya tawhanong mosagubang sa mga gahum sa siyudad, mopuyo sa bag-ong kagawasan diha sa kadagatan ug mosud-ong sa kamatuoran uban ni Jesus diha sa bukid!	Sa inyong komunidad diin ang inyong GSK nahimutang, unsa ang mga nagkalain-laing mga grupo sa pag-too nga anaa karon? Unsa ang imong relasyon tali kanila? Unsa mang mga sigamno ang imong gipanghisgotan uban kanila? Unsa man ang imong mga kahadlok ug mga paglaom sa pagpaki-glambigit uban kanila?	“Kon ang usa ka Kristiyano mahigugma, siya gayud mahigugma susama sa kasingkasing ni Kristo, nga andam mobayad sa bili bisan pa sa pagtugyan sa kinabuhi alang sa mga kaigsoonan.”

U bani si Fr. Ben Alforque, MSC sa Missionaries of the Sacred Heart sa iyang **GOSPEL BREAK**, hamubo apan makalingaw nga video mahitungad sa Ebanghelyo karong Dominggo. Bisitaha ang gospelbreak.wordpress.com. o pinagi sa inyong smartphone o tablet i-swipe kini nga QR code.



Padayag sa Pagtoo

P: Nagatoo ako...

K: ...Sa Dios ang Amahan ang makagagahum sa tanan, Magbubuhay sa langit ug yuta; nagatoo ako kang Jesukristo, ang Iyang bugtong Anak, atong Ginoo. Gipanamkon Siya sa lalang sa Espiritu Santo, (*Moyukbo*)

ang tanan) ug natawo gikan ni Maria nga Ulay. Nag-antos Siya sa sugo ni Poncio Pilato, gilansang sa krus, namatay ug gilubong. Miadto Siya sa mga nangamatay. Sa ikatulong adlaw nabanhaw Siya. Misaka Siya sa langit ug nagalingkod sa too sa Dios, ang Amahan, ang makagagahum sa tanan. Mobalik Siya aron paghukom sa mga buhi ug sa mga minatay. Nagatoo usab ako sa Espiritu Santo, sa santos ug Katoliko nga Simbahan, sa pagpasaylo sa mga sala, sa pagkabanhaw sa lawas, ug sa kinabuhing walay katapusan. Amen.

Mga Katilingbanong Pag-ampo **Katilingbanong Pag-ampo**

P: Mga igsoon, kitang tanan moduol sa atong Amahan sa langit, ug pangayoon nato kaniya nga hatagan kita sa mga gasa nga atong gikinahanglan dinhi sa yuta. Sa matag pag-ampo, kita motubag: Ginoo, dungga ang among pag-ampo.

T: Ginoo, dungga ang among pag-ampo.

L: Mag-ampo kita alang sa Simbahan: nga isip usa ka Simbahan sa Kabus sa tibook kalibutan, siya lig-onon sa Espiritu Santo diha sa iyang pakigdiyologo nga matitud-anon uban sa mga gamhanan sa kalibutan, sa iyang pagpatigbabaw ang iyang kagawasan sa pagbuhat sa hustisya ug pag-usab sa kalibutan alang sa kalinaw. Mag-ampo kita sa Ginoo.

T: Ginoo, dungga ang among pag-ampo.

L: Alang sa atong Santo Papa Francisco I, sa mga obispo, pari, diyakono, kanilang nanagpuyo sa kinabuhing konsagrado ug sa tanang gitugyanan sa pag-amoma ug pagdumala sa Simbahan isip katawhan sa Dios: nga, dinasig sa Espiritu Santo, sila magpadayon sa pagtigom sa mga tawo sa nagkalain-lain mga tinuhoan ug mga relihiyon, uban sa mga tawo nga sa dayag milimud sa Dios, sa diyologo

alang sa kalinaw pinasikad sa hustisya, alang sa gugma nga gipasukad sa pagkainantosan, pagsinabtanay sa usag-usa ug pagkamanggihatagon sa pagpakigbahin. Mag-ampo kita sa Ginoo.

T: Ginoo, dungga ang among pag-ampo.

L: Alang sa mga pangulo sa kalibutan ug sa tanang gitugyanan sa pangagamhanan ug pagdumala sa mga butang sa kalibutan: nga sila magpadayon sa pag-atiman niadtong nanagpuyo nga walay gugma, sa mga biktima sa gubat, diskriminasyon, inhustisya, prostitusyon ug pag-abuso sa droga. Mag-ampo kita sa Ginoo.

T: Ginoo, dungga ang among pag-ampo.

L: Alang kanatong tanan, mga lumulupyong sa kalibutan ug mga lungsoranon sa langit: nga kita magdinasigay sa usag-usa sa pagtinabangay diha sa atong mga panginahanglan, nga ang matag usa kanato motampo sa iyang bahin alang sa pagkab-ot sa panaghiusa sa kasingkasing ug espiritu, ug kita unta sa kanunay maghukom ug maglihok sumala sa mga bili sa hustisya ug gugma. Mag-ampo kita sa Ginoo.

T: Ginoo, dungga ang among pag-ampo.

L: Alang sa mga hinigugma natong nipanaw na: nga sa kapasayloan sa ilang mga sala, sila makakaplag sa walay katapusang pagpahulay diha sa kasingkasing sa atong Ginoo ug Manluluwas nga si Hesukristo. Mag-ampo kita sa Ginoo.

T: Ginoo, dungga ang among pag-ampo.

L: Alang sa atong espesyal nga mga tinguha, diha sa kahilom sa atong kasingkasing. (*Hunong*) ...Mag-ampo kita sa Ginoo.

T: Ginoo, dungga ang among pag-ampo.

P: Ginoong Dios, pamatia ang among mga pag-ampo nga among gipadayag

diha kanimo karon. Lig-ona ang among pagtuo nga aktibo sa paghigugma kanimo ug sa among silingan nga nagkinahanglan. Himoa kami nga makakita, maghukom ug molihok sa unsay kahintang sa kalibutan subay sa panglantaw sa imong kasingkasing. Kini among gipangayo pinaagi ni Kristo among Ginoo.

T: Amen.

LITURHIYA SA EUKARISTIYA

Paghalad sa mga Gasa

P: Dayegon ikaw, Ginoong Dios sa tanang kalibutan, kay gikan sa imong kamanggihatagon nadawat namo kining among gihalad kanimo, ang pan nga abut sa yuta ug ginama sa kamot sa mga tawo. Mahimo kini nga kalan-on sa kinabuhi alang kanamo.

K: Daygon ang Dios hangtod sa kahangturan.

P: Dayegon ikaw, Ginoong Dios sa tanang kalibutan, kay gikan sa imong kamanggihatagon nadawat namo kining among gihalad kanimo, ang bino nga abut sa yuta ug ginama sa kamot sa mga tawo. Mahimo kini nga ilimnon nga espirituhanon alang kanamo.

K: Daygon ang Dios hangtod sa kahangturan.

P: Mga igsoon, pag-ampo kamo, aron ang ako ug ang inyong sakripisyo dawaton unta sa Dios nga Amahan, makagagahom sa tanan.

K: Dawaton unta sa Ginoo ang sakripisyo gikan sa imong mga kamot; alang sa pagdayeg ug paghimaya sa iyang ngalan, alang usab sa atong kapuslanan ug sa tibuok niyang santos nga Simbahan.

Pag-ampo Alang sa Mga Halad

P: Kahimut-i, O Ginoo, sa pagdawat sa mga halad sa imong Simbahan, kay sa imong kalooy imo silang gihatag aron ikahalad ug pinaagi sa imong gahum giusab mo sila ngadto sa misteryo sa among kaluwasan. Pinaagi ni Cristo

among Ginoo.

K: Amen.

Prepasyo

P: Ang Ginoo maanaa kaninyo.

K: Maanaa usab kanimo.

P: Ibayaw ang inyong mga kasingkasing.

K: Amo nang gibayaw ngadto sa Ginoo.

P: Magpasalamat kita sa Ginoong atong Dios.

K: Angay ug matarong.

P: Angay ug matarung gayud, sibo ug makaluwas, kanunay ug sa tanang dapit nga magpasalamat kami kanimo, Ginoo, santos nga Amahan, labawng makagagahom ug walay-kinutubang Diyos.

Kay diha kanimo nabuhi ug naglihok ug nahimo kaming tawo, ug samtang ania kami niining lawas nasinati namo dili lamang ang inadlaw-adlaw nga mga epekto sa imong pag-amoma, kondili bisan karon amo nang naangkon ang pasalig mo sa saad sa kinabuhi nga walay katapusan.

Kay, ingon nga nadawat namo ang unang mga bunga sa Espiritu, nga pinaagi kaniya gibanhaw mo si Jesus gikan sa mga minatay, kami nagalaum alang sa usa ka walay katapusang bahin sa Misteryo Paskuwal.

Ug busa, uban sa tanan nga mga anghel, kami nagadayeg kanimo, ingon sa malipayon nga pagsaulog kami nagamantala:

Santos

K: Santos, Santos, Santos nga Ginoo, Dios sa kagahuman. Puno ang langit ug yuta sa imong himaya. Osana sa kahitas-an. Dayegon ang nagaanhi sa ngalan sa Ginoo. Osana sa kahitas-an.

Pag-ampo sa Eukaristiya

(Human sa konsagrasyon, ang aklamasyon:)

P: Kini ang misteryo sa pagtoo.

K: Luwasa kami, Manluluwas sa kalibutan, kay pinaagi sa imong Krus ug Pagkabanhaw imo kaming gihatagan ug kagawasan.

(Sa pagtapos sa Pag-ampong Eukaristiko, ang pari moingon:)

P: Pinaagi kaniya, uban kaniya ug diha kaniya, gihatag nganha kanimo makagagahom nga Amahan, diha sa kahiusa sa Espiritu Santo ang tanang dungog ug himaya hangtod sa kahangturan.

K: Amen.

Rito sa Pangalawat

P: Karon mag-ampo kita sa Amahan, atong gamiton ang mga pulong nga gitudlo kanato sa atong Manunubos.

K: Amahan namo, nga anaa sa mga langit, pagdayegon ang imong ngalan, umabot kanamo ang imong ginharian, matuman ang imong pagbuot dinhi sa yuta maingon sa langit. Ang kalan-on namo sa matag adlaw, ihatag kanamo karong adlaw ug pasayloa kami sa among mga sala, ingon nga nagapasaylo kami sa mga nakasala kanamo, ug ayaw itugot nga mahulog kami sa panulay hinonoa luwasa kami sa dautan.

P: Mangayo kami kanimo, Ginoo, nga imo kaming luwason sa tanang dautan. Hatagi kami sa kalinaw niining panahona, aron, tinabangan sa imong kalooy, mahalikay kami kanunay sa sala ug mahilayo sa tanang kasamok, samtang nagapaabot kami nga malaumon sa pagbalik ni JesuKristo, among manunubos.

K: Kay imo man ang ginharian/ ug ang gahom ug ang himaya/ hangtod sa kahangturan.

P: Ginoong JesuCristo, nag-ingon ka sa imong mga Apostoles, “Ang kalinaw ibilin ko kaninyo, ang akong

kalinaw ihatag ko kaninyo.”

Ayaw tan-awa ang among mga sala, kondili ang pagsalig sa imong Simbahan ug sibo sa imong kabubut-on hatagi kami sa imong kalinaw ug kahiusa, Ikaw nga buhi ug hari hangtod sa kahangturan.

K: Amen.

P: Ang kalinaw sa Ginoo sa kanunay maanaa kaninyo.

K: Maanaa usab kanimo.

P: Ipakita ta ang atong panag-inigsoonay.

Kordero sa Dios

K: Kordero sa Dios nga nagawatang sa mga sala sa kalibutan, kaloy-i kami. Kordero sa Dios nga nagawagtang sa mga sala sa kalibutan, kaloy-i kami. Kordero sa Dios nga nagawagtang sa mga sala sa kalibutan, hatagi kami sa kalinaw.

Pangalawat

P: Kini mao ang Kordero sa Dios nga nagawagtang sa mga sala sa kalibutan. Bulahan ang gidapit alang sa panihapon sa Ginoo.

K: Ginoo, dili ako angay nga mokalawat kanimo, apan ipamulong lamang ug mamaayo ako.

Antipona sa Pagpangalawat:

Ang pan nga akong ihatag, nag-ingon ang Ginoo, mao ang akong unod alang sa kinabuhi sa kalibutan.

Pag-ampo Human sa Pangalawat

P: Mag-ampo kita: Hinaut nga ang pakig-ambit diha sa imong Sakramento nga among nakaon, makaluwas kanamo, O Ginoo, ug molig-on kanamo diha sa kahayag sa imong kamatuoran. Pinaagi ni

Kristo among Ginoo.

K: Amen.

Katapusang Panalangin:

P: Ang Ginoo maanaa kaninyo.

K: Maanaa usab kanimo.

P: Iduko ang atong ulo alang sa panalangin: Bendisyonan unta kamo sa Diyos uban sa tanang mga langitnong panalangin, sa kanunay himoon unta kamong mga balaan ug putli sa iyang mga mata, madagayaong ibubo diha kaninyo ang mga bahandi sa iyang himaya, ug tudloan unta kamo sa mga pulong sa kamatuoran; pahimangnoan unta kamo niya sa Ebanghelyo sa kaluwasan, ug tugyanan kamo kanunay sa inigsuon nga gugma. Pinaagi kang Kristo nga atong Ginoo.

K: Amen.

P: Ug ang mga panalangin sa labawng makagagahum nga Dios, ang + Amahan ug Anak ug ang Espiritu Santo, mokunsad unta diha kaninyo ug magpabilin diha kaninyo kanunay.

K: Amen.

Pagpanglakaw

P: Panglakat kamo ug isangyaw ang nindot nga balita sa Ginoo.

K: Salamat sa Dios. ■

Please help us continue publishing this Missalette with your donation.

Any amount is appreciated
no matter how small.

Thank you!

Account Name:

Communication Foundation for Asia
Metrobank V-Mapa, Sta. Mesa,

Manila Branch:

SA# 3306-509-480

BDO Old Sta. Mesa Road, Manila Branch:

SA# 7090-042-836

Please fax deposit slip to 713-2736

We are located at # 4427 Old Sta. Mesa St.,
Sta. Mesa, Manila

**Gisangyaw sa
Simbahan sa
Kabus, pinaagi
sa Gagmayng
Simbahanong
Katilingban,
diha sa usa ka
diyologo, ang
kadagaya sa
presensya sa
Dios kon siya
tawhanong
mosagubang
sa mga
gahum sa
siyudad,
mopuyo sa
bag-ong
kagawasan
diha sa
kadagatan ug
mosud-ong sa
kamatuoran
uban ni Jesus
diha sa bukid!**